

Vargjet Biblikë qe flasin per meshiren

**Psalmi 13, 6**

<sup>6</sup> Por unë jam i sigurt në dashurinë tënde,  
le të galdojë shpirti im në shpëtimin tënd!  
Do t'i këndoj Zotit, Bamirësit tim!

**Psalmi 23, 6**

<sup>6</sup> Hiri dhe mirësia do të më përcjellin  
në të gjitha ditët e jetës sime,  
do të banoj në shtëpinë e Zotit  
derisa të jem gjallë.

**Psalmi 25, 6-7**

<sup>6</sup> Të të bien në mend mëshirat e tua, o Zot,  
dhe dashuria jote që është e amshueshme.  
<sup>7</sup> Mos i kujto fajet e rinisë sime e paudhësitë:  
të të bie në mend për mua sipas dashurisë sate  
për hir të mirësisë sate, o Zot.

**Psalmi 31, 7**

<sup>8</sup> Me gëzim do t'i brohoris mirësisë sate  
se ti shikove me dhimbje mbi mjerimin tim,  
ti i ndihmove shpirtit tim në ditë të ngushtë;

**Psalmi 33, 22**

<sup>22</sup> Mirësia jote qoftë mbi ne, o Zot,  
sikurse ne shpresojmë në ty.

**Psalmi 57, 9-11**

<sup>9</sup> do të këndoj, këngës do t'ia them!  
Zgjohu, lavdia ime,  
Zgjohu, o harpë e cetër,  
dua ta zgjoj agimin!  
<sup>10</sup> Do të të lavdëroj ndër popuj, o Zot,  
ty do të të këndoj ndër kombe.  
<sup>11</sup> Sepse u madhërua deri në qiell dashuria jote,  
e deri në re e vërteta jote!

**Psalmi 86, 5**

<sup>5</sup> Sepse ti, o Zot, je i ëmbël e i butë,  
plot mëshirë për ata që të thërrasin në ndihmë.

**Psalmi 94, 17-18**

<sup>17</sup> Po të mos e kisha pasur në ndihmë Zotin,  
përpak shpirti im do të banonte në vendin e  
Heshtjes!

<sup>18</sup> Kur unë kujtoja: "Më rrëshqiti këmba!",  
dashuria jote, o Zot, ma ngjiti dorën!

**Psalmi 100, 4-5**

<sup>4</sup> Hyni nëpër dyert e tija duke i dhënë lavd,  
hyni në treme të tija e këndonit himne,  
lavdërojeni e madhërojeni Emrin e tij!  
<sup>5</sup> Sepse i mirë është Zoti,  
e amshuar dashuria e tij,  
nga breznia në brezni besnikëria e tij.

**Psalmi 103, 8-12**

<sup>8</sup> Zoti është i mirë e i mëshirshëm,  
i ngadalshëm në zemërim e shumë i dashur.

<sup>9</sup> Nuk zemërohet gjithherë  
as s'e mban hidhërimin për jetë të jetës.

<sup>10</sup> Nuk sillet me ne sipas mëkateve tona  
as nuk na shpague sipas të këqijave tona.

<sup>11</sup> Sepse sa është lartësia e qiellit mbi tokë,  
aq e madhe është mëshira e tij ndaj atyre që i  
druajnë.

<sup>12</sup> Sa është lindja larg perëndimit  
aq larg i hedh prej nesh fajet tona.

**Psalmi 109, 26-27**

<sup>26</sup> Më ndihmo, o Zot, Hyji im,  
më shpëto në saje të mëshirës sate,

<sup>27</sup> le ta dinë se kjo është dora jote:  
se ti, o Zot, e bërë këtë vepër!

### ***Psalmi 130, 7***

<sup>7</sup> Le të shpresojë Izraeli në Zotin,  
sepse te Zoti është mëshira  
dhe i madh është tek Ai shpërblimi.

### ***Psalmi 136, 1***

<sup>1</sup> Lavdëroni Zotin, sepse është i mirë,  
sepse e amshueshme është dashuria e tij!

### ***Psalmi 145, 8-10***

<sup>8</sup> Zoti është vetë butësia e mëshira,  
i ngadalshëm në zemërim dhe plot dashuri.  
<sup>9</sup> Zoti është i mirë për të gjithë,  
i dhimbshëm për të gjitha krijesat e veta.  
<sup>10</sup> Le të lavdërojnë, o Zot, të gjitha veprat e tua  
e le të bekojnë shenjtërit e tu.

### ***Psalmi 147, 10-11***

<sup>10</sup> S'i jep rëndësi fuqisë së kalit,  
s'i merr parasysht kërcëkët e trimit:  
<sup>11</sup> Zotit i pëlqejnë ata që e druajnë,  
ata që shpresojnë në mirësinë e tij.

### ***PSALMI 136***

<sup>1</sup> ALELUJA!

Lavdëroni Zotin, sepse është i mirë,  
sepse e amshueshme është dashuria e tij!

<sup>2</sup> Lavdëroni Hyjin e hyjnive,  
sepse e amshueshme është dashuria e tij!

<sup>3</sup> Lavdëroni Zotin e zotave,  
sepse e amshueshme është dashuria e tij!

<sup>4</sup> Ai i vetmi bëri mrekulli të mëdha,  
sepse e amshueshme është dashuria e tij!

<sup>5</sup> Me dije të madhe Ai e krijoi qiellin,  
sepse e amshueshme është dashuria e tij!

<sup>6</sup> Ai e forcoi tokën mbi ujëra,  
sepse e amshueshme është dashuria e tij!

<sup>7</sup> Ai i krijoi dritëdhënësit e mëdhenj,  
sepse e amshueshme është dashuria e tij!

<sup>8</sup> Diellin që ta sundojë ditën,  
sepse e amshueshme është dashuria e tij!

<sup>9</sup> Hënën dhe yjet që ta sundojnë natën,  
sepse e amshueshme është dashuria e tij!

<sup>10</sup> Ai e goditi Egjiptin në të parëlindurit e tij,  
sepse e amshueshme është dashuria e tij!

<sup>11</sup> Ai e nxori Izraelin nga mesi i tyre,  
sepse e amshueshme është dashuria e tij!

<sup>12</sup> Me dorë të fortë e me krah të fuqishëm,  
sepse e amshueshme është dashuria e tij!

<sup>13</sup> Ai e ndau dysh Detin e Kuq,  
sepse e amshueshme është dashuria e tij!

<sup>14</sup> E kaloi Izraelin mes për mes tij,  
sepse e amshueshme është dashuria e tij!

<sup>15</sup> E plandosi faraonin e ushtrinë e tij në Detin e Kuq,  
sepse e amshueshme është dashuria e tij!

<sup>16</sup> E udhëhoqi popullin e vet nëpër shkretëtirë,  
sepse e amshueshme është dashuria e tij!

<sup>17</sup> Ai i goditi mbretërit e mëdhenj,  
sepse e amshueshme është dashuria e tij!

<sup>18</sup> Vrau mbretër të fuqishëm,  
sepse e amshueshme është dashuria e tij!

<sup>19</sup> Sehonin, mbretin e amorrenjve,  
sepse e amshueshme është dashuria e tij!

<sup>20</sup> Edhe Ogun, mbretin e Basanit,  
sepse e amshueshme është dashuria e tij!

<sup>21</sup> Dhe i dhuroi tokën, pronën e tyre,  
sepse e amshueshme është dashuria e tij!

<sup>22</sup> për trashëgim Izraelit, popullit të vet,  
sepse e amshueshme është dashuria e tij!

<sup>23</sup> Ai na kujtoi në përvujtërimin tonë,  
sepse e amshueshme është dashuria e tij!

<sup>24</sup> Ai na shpëtoi nga armiqtë tanë,  
sepse e amshueshme është dashuria e tij!

<sup>25</sup> Ai u jep ushqim të gjitha gjallesave,  
sepse e amshueshme është dashuria e tij!

<sup>26</sup> Lavdërojeni Perëndinë e qiellit,  
sepse e amshueshme është dashuria e tij!